

MOHD Iqbal melihat bangkai ikan paus di pesisir pantai Tanjung Batu.



Bangkai ikan paus 80kg gemparkan penduduk Kampung Tanjung Batu

HM 22/02/24 MS 25

Pekan: Penduduk Kampung Tanjung Batu dekat sini, gempar dengan penemuan bangkai seekor ikan paus seberat lebih 80 kilogram (kg) yang terdampar di pantai kampung berkenaan di sini, Isnin lalu.

Ikan paus berukuran kira-kira tiga meter panjang itu dipercayai jenis *Odontocete* atau ikan paus bergigi berdasarkan fizikal giginya hanya ada pada rahang bawah dan badan yang panjang.

“**Bangkai mamalia terbabit dipercayai hanyut dibawa arus selepas berlaku air pasang besar**”
Mohd Iqbal

Ia dipercayai tersesat sebelum memasuki perairan Pekan dan terdampar di pantai Tanjung Batu yang terletak hampir dengan projek mendalamkan muara Sungai Tering.

Seorang penduduk, Mohd Iqbal Zahir Mohd Khamsani, 36, berkata, dia adalah individu pertama yang menemui bangkai ikan paus berkenaan di pesisir pantai kira-kira jam 6.30 petang selepas dibawa arus air laut.

Menurutnya, ketika itu dia bersiar di tepi pantai bersama anaknya, apabila terlihat bangkai ikan paus berkenaan yang dipercayai masih baharu lagi mati, fizikalnya masih sempurna tanpa sebarang kecederaan.

“Saya agak terkejut melihat mamalia terbabit kerana ia kali pertama melihatnya secara dekat dan memegangnya, sebelum ini hanya melihat di televisyen.

“Bangkai mamalia terbabit dipercayai hanyut dibawa arus selepas berlaku air pasang besar yang mula berlaku kira-kira jam 10 malam,” katanya.